



Акафист Агапиту Печерскому

Кондак 1

Избранный учениче великаго учителя, преподобнаго и богоноснаго отца нашего Антония, и дивный подражателю жития его святаго, святе отче Агапите, песнию восхвалим тя с любовью, заступника нашего; ты же, яко имеяй дерзновение ко Господу, молися выну о спасении нас, грешных, от всяких бед избавляя зовущих ти:

Радуйся, Агапите, душевных и телесных недугов скорый целителю.

Икос 1.

Ангелов любезную чистоту от юности твоя возлюбив, блаженне Агапите, к добродетелей подвижнику, преподобному Антонию притекл еси и, от него во иночество облеченный, подражатель ревностный подвигов его был еси; темже славим тя воззванием сими:

Радуйся, богоноснаго Антония добродетелей и даров наследниче;

Радуйся, на высоту совершенства духовнаго возшедый.

Радуйся, молитвами усердными дар врачевания и чудотворения от Господа получивый;

Радуйся, из глубины души воздыханьми чистоту душевную стяжавый.

Радуйся, Агапите, душевных и телесных недугов скорый целителю.

Кондак 2

Видев Всевидец Господь благое души твоея изволение, блаженне Агапите, еже поработати Ему безленостно, внуши преподобному Антонию благословити тя на жестокое в пещернем затворе житие.

Ты же, благословение святое с верою прием, в пещере покой вечный обрел еси, Единому Богу работая в пениих, бдениих и пощениих, немолчно воспевая Ему: Аллилуиа.

Икос 2.

Разумев преподобный Антоний произволение Божие возсияти в сем иноце вельми благоугодным начинанием и душеспасительным намерением, изобильно насытил духовною сладостию и в добродетелех укрепил еси, сего ради вопием ему таковая:

Радуйся, преподобнаго Антония нравы себе усвоивый;

Радуйся, того житию усердно поревновавый.

Радуйся, сыновню любовь к нему стяжавый;

Радуйся, и от него зело возлюбленный.

Радуйся, самовидче его подвигов;

Радуйся, во врачевании недугов ему споспешествующий.

Радуйся, Агапите, душевных и телесных недугов скорый целителю.

Кондак 3

Силою Божиею укрепляемый, святе Агапите, великия иноческия труды подъял еси;

сего ради благословися дело руку твоею во славу имени Господня на спасение и врачевание всех, с верою и надеждою к тебе притекающих и неленостно возносящих песнь Пресвятей Троице: Аллилуиа.

Икос 3

Имея помысл чист и непорочну совесть и памятуя Рекшаго:

«Болен бех, и посетисте Мене... понеже сотвористе единому сих братьий Моих меньших, Мне сотвористе», недугующих иноков под свой покров отечески приемля, якоже родители чада своя, утешал еси, отраду своим попечением подающе и отеческою ласкою тяжесть болезни облегчающе, молитвою с одра болезни воздвизал еси.

Сего ради приими от нас благохваления таковая:

Радуйся, в добродетелех благоискусный подвижнике;

Радуйся, во Христе всю братию монашескую возлюбивый.

Радуйся, недужных иноков смиренный и неусыпный служителю;

Радуйся, за подвиги временнаго жития покой вечный обретший.

Радуйся, Агапите, душевных и телесных недугов скорый целителю.

Кондак 4

Бурю многомятежнаго житейскаго моря безбедно прошел еси, блаженне, и в пристань безстрастия достигл еси, окормляемь заповедьми Христа Бога, яже быша светильник ногама твоима и свет стезям твоим.

Темже ныне в горних обителях водворяешися, сладце поя Триединому Богу: Аллилуиа.

Икос 4

Слышавше мнози о благоугодном житии твоём, блаженне Агапите, прихождаху к тебе: ови послушати поучений твоих, ови исцелений от различных недугов прияти; ихже ты, с отеческою любовью приемля, руководствовал еси ко спасению, отгоняя всяк недуг и всяку немощь. Сего ради и мы прибегаем к тебе, великому помощнику и целителю, славяще тя сице:

Радуйся, безмолвия любителю, обитель Печерскую подвиги своими красивый;

Радуйся, спасения многих душ человеческих виновниче.

Радуйся, болезнующих грехми врачу благоискусный;

Радуйся, воине Христов, полки невидимых врагов победивый.

Радуйся, ближняя твоя искренне возлюбивый;

Радуйся, спасению их душевному и исцелению телесному усердно послуживый.

Радуйся, Агапите, душевных и телесных недугов скорый целителю.

Кондак 5

Боготечное светило быв, угодниче Божий, всех к Солнцу Правды – Христу путеводил еси примером жития твоего святого, иже все бысть посвящено на служение Богу и ближним твоим.

Нищия и убогия милостивно питал еси, темже блаженство милостивых унаследовал еси и со святыми поеши вечно хвалебную песнь: Аллилуиа.

Икос 5

Видим тя, блаженне отче Агапите, достигшаго в меру мужа совершенна о Христе и преисполненна дарований Божественных, в Евангелии Христове обетованных верным последователем Бога Слова.

Темже, чудящися твоим подвигом, поем ти хвалебно:

Радуйся, в глубине сердца бисер драгий – Господа Иисуса Христа – обретый;

Радуйся, имя Его Божественное во устех и в сердце своем выну имевый.

Радуйся, на земле алкавый и жаждавый, ныне же нетленные пищи на небеси насыщайся;

Радуйся, нищету хранивый, нищих от глада избавляяй.

Радуйся, иго Христова благое и легкое искренне возлюбивый.

Радуйся, Агапите, душевных и телесных недугов скорый целителю.

Кондак 6

Проповедник быв житием твоим Евангельских добродетелей, отче блаженне, плоть твою постом и молитвою поработил еси и во славу Божию пожил еси;

лучами своих подвигов всезлобного врага, армянина нечестиваго, завистию и гневом палимага и своими злостыми ухищреньми веселящаяся, не токмо посрамил еси, но и к свету Христовой истины привел еси, поучая за все благодарити и славословити Господа, поя Ему: Аллилуиа.

Икос 6

Возсияв в пещере святых обители сия, яко богоносное светило, блаженне Агапите, светом добрых дел и врачеваний умилил еси души и сердца человеков, а нечестиваго врача и завистника и его безстудное безумие посрамил еси.

Тем убо тебе, святому и блаженному угоднику, умильно зовем:

Радуйся, врачевание нечестиваго армянина посрамивый;

Радуйся, обреченнаго на смерть тем же армянином недугующаго со одра болезни воздвигнувый.

Радуйся, осужденнаго на смерть и напоеннаго смертным ядом чудесно исцеливый и от смерти избавивый;

Радуйся, испивый смертный яд от врага и, по слову Господню: «Аще что и смертно испиют, не вредит их», — живот невредимый сохранивый.

Радуйся, злобу и коварство врагов своих посрамивый.

Радуйся, Агапите, душевных и телесных недугов скорый целителю.

Кондак 7

Хотение единое имел еси, блаженне отче, еже Богу угождати и спасению душевному и здравью телесному ближних твоих благочестно служить. Темже келлиа твоя пещерная бысть лечебница благоутишная всякому человеку – нищему и богатому, князю и убогому. Ты же, единое в сердце имея: «Всем бых вся», врачевал еси, не взирая на лица, призывая всех вкупе сердцем и усты немолчно возглашати Богу: Аллилуиа.

Икос 7

Новаго тя чудотворца великаго позна славный князь Владимир Мономах, на одре болезни возлежа, пребывая при кончине своей, слезно молил еси тя притещи и исцелити его. Но ты, монашеский обет соблюдая - николиже стен обители оставляти, послал еси зелие от трапезы своея, и князь, вкусив его, здрав восташа. Таковой силе твоего чудотворения и нелицеприятия дивящися, вопием ти хвалебно:

Радуйся, крине пещернаго прозябения;

Радуйся, мира Христова благоухание.

Радуйся, не скрывый талант врачевания, тебе Домовладыкою врученный;

Радуйся, ради сильных мира сего обета иноческаго не нарушивый.

Радуйся, славы ради вышняго звания славу человеческую ни во чтоже вменивый;

Радуйся, Великаго князя Владимира Мономаха с одра смертнаго недуга былием, тобою благословенным, и молитвою подъял еси.

Радуйся, Агапите, душевных и телесных недугов скорый целителю.

Кондак 8

Странника и пришельца в мире сем помышлял еси себе быти, Агапите блаженне, темже о богатстве земнем всякое попечение отложил еси. Всякое стяжание суетное возбраняя, приходящих к тебе разделяти достояние свое с нищею братиею и в ея лице Самому Христу служить поучал еси, немолчно воспевая хвалебную песнь: Аллилуиа.

Икос 8

Весь в Бозе быв, отче блаженне, о Бозе и угождении Ему присно поучал еси, умоляя ничтоже предпочитати паче любви Христовы и, памятуя реченное Христом: «Не собирайте себе сокровища на на земли, идеже моль и ржа истребляют, но собирайте себе сокровища на небеси», – не пожелал ради благ временных лишиться благ вечных, отвергал еси вся дары, тебе князем приносимыя, поучая раздавати их нищей братии и убогим. Темже и мы, таковое твое нищелюбие восхваляя, зовем ти сице:

Радуйся, блаженство нищих духом унаследовавый;

Радуйся, нищету паче богатства возлюбивый.

Радуйся, мзду за свое врачевание отвергий и раздати ю нищим и убогим повелевый;

Радуйся, последняя укрухи хлеба своего с неимущими разделяти поучавый.

Радуйся, любовь к Богу любовью к ближним своим свидетельствовавый;

Радуйся, похвалами молитвенными до днесь в обители Печерской зело почитаемый.

Радуйся, Агапите, душевных и телесных недугов скорый целителю.

Кондак 9

Всем приходившим в обитель молитв и врачевания ради, блаженне отче, дивно бысть видети тебе, нищетно в келлии твоей пребывающего, обаче ты, всех равною любовью приемля, коемуждо слово утешения или исцеление подавал еси, научая пети виновнику всех благих Богу: Аллилуиа.

Икос 9

Вития многовещанные не возмогут достойно воспети подвиги и чудотворения твоя, блаженне Агапите, мы же, таковому житию твоему дивящиеся, дерзаем венчати тебе, аще и недостойнии, похвалами таковыми:

Радуйся, на скрижалях сердца твоего Закон Христов написавый;

Радуйся, от глубины сердечныя добрая и душеспасительная наставления человеком износивый.

Радуйся, пещерный гражданин, грады и веси наполнивый славою твоих чудотворений;

Радуйся, Богом возлюбленный и ближними твоими благословляемый.

Радуйся, образ совершенства о Христе в себе явивый;

Радуйся, иго Христово, благое и легкое, искренне возлюбивый.

Радуйся, Агапите, душевных и телесных недугов скорый целителю.

Кондак 10

Спасения надежду стяжал еси при исходе твоём, блаженне отче Агапите, и яко пшеница зрелая, во время пожатия, кончиною благою преселился еси в день, тебе прежде указанный Господом, во обители горния, прияти мзду от руки праведнаго Мздовоздаятеля Христа, Иже вчини душу твою со духи святых, немолчно возглашающих пред Престолом славы Его победную песнь: Аллилуиа.

Икос 10

Царя Небеснаго Христа верный раб и последователь был еси, отче Агапите, темже по неложному Его глаголу: «Идеже есмь Аз, ту и слуга Мой будет», мы, чтуще тя, веруем несумненно, яко ты со Христом во обителях блаженства вечнаго водворяешься и радости нетленные наслаждаешься, яко истинный Того угодник; от нас же слышиши благохваления сия:

Радуйся, предсказания нечестиваго армянина о твоей смерти посрамивый;

Радуйся, о дне твоея блаженных кончины от Господа извещенный.

Радуйся, душу твою в руке Господа радостно предавый;

Радуйся, откровенным лицом славу Трисияннаго Божества созерцая.

Радуйся, телом смертным в пещере погребенный;

Радуйся, душею бессмертною к Сиону горнему воспаривый.

Радуйся, Агапите, душевных и телесных недугов скорый целителю.

Кондак 11

Пение Пресвятей Богородице приносиши, блаженне отче наш Агапите, о обители твоей святей и подвижающихся в ней, и о всех с любовью к тебе притекающих присно ходатайствуеши, прося мира свыше и благопоспешения всем, возносящим достодолжная похвалы Триединому Богу, воспевая Ему: Аллилуиа.

Икос 11

Светильника ты добрых дел, блаженне отче, исповедуем быти и прославляем прославльшаго ты Господа, Иже чудесы многими мощи твоя ознаменова: струи бо исцелений благодатных источаеши от них недужным и подвижаеши верныя вопити тебе:

Радуйся, земный ангеле и небесный человече;

Радуйся, безмезднаго врачевания источниче.

Радуйся, мира многоцелебнаго преисполненный фиало;

Радуйся, от раки твоея святыя исцеления обильно подаваяй.

Радуйся, скорбящих утешителю;

Радуйся, унывающих ободрителю.

Радуйся, Агапите, душевных и телесных недугов скорый целителю.

Кондак 12

Благодать Господню испроси нам, отче Агапите, почитающим с любовью святую память твою и усердно притекающим к честней раце мощей твоих, от неяже чудесныя исцеления подаеши недужным.

Темже тебе, чудотворения даром от Бога прославленному, прилежно молимся: исцели наша недуги душевныя и телесныя и помози нам предстательством твоим спасение вечное получить, да вкупе с тобою воспоем дивному во святых Своих Богу: Аллилуиа.

Икос 12

Поюще подвиги твоя, блаженне отче, ублажаем равноангельское житие твое, дивимся чудотворением твоим, молитвенно почитаем святую память твою и, припадающе к раце мощей твоих, умильно взываем:

Радуйся, Пресвятая Богородицы достойный молитвенниче;

Радуйся, пещерожителей славо и похвало.

Радуйся, святые обители Печерския, вкупе с Антонием и Феодосием, присное охранение;

Радуйся, подвизающихся в ней благонадежное заступление.

Радуйся, приходящих в ню на поклонение благий предстателю;

Радуйся, почитающих память твою небесный покровителю.

Радуйся, Агапите, душевных и телесных недугов скорый целителю.

Кондак 13

О, преблаженне отче Агапите!

Ты – горе на небеси, мы же – долу на земли, удаленные от тебе не толико местом, колико греховною нечистотою на шею, обаче дерзаем приносить тебе сие малое похвальное пение, егоже милостивно прием, моли Господа и Владыку нашего избавити нас погибели вечныя и сподобити блаженства святых, вопиющих Ему выну хвалебную песнь: Аллилуиа.

Этот кондак читается трижды, затем 1-й икос и 1-й кондак.

Икос 1

Ангелов любезную чистоту от юности твоея возлюбив, блаженне Агапите, к добродетелей подвижнику, преподобному Антонию притекл еси и, от него во иночество облеченный, подражатель ревностный подвигов его был еси; темже славим тя воззвании сими:

Радуйся, богоноснаго Антония добродетелей и даров наследниче;

Радуйся, на высоту совершенства духовнаго возшедый.

Радуйся, молитвами усердными дар врачевания и чудотворения от Господа получивый;

Радуйся, из глубины души воздыханьми чистоту душевную стяжавый.

Радуйся, Агапите, душевных и телесных недугов скорый целителю.

Кондак 1

Избранный учениче великаго учителя, преподобнаго и богоноснаго отца нашего Антония, и дивный подражателю жития его святаго, святе отче Агапите, песнию восхвалим тя с любовью, заступника нашего; ты же, яко имеяй дерзновение ко Господу, молися выну о спасении нас, грешных, от всяких бед избавляя зовущих ти:

Радуйся, Агапите, душевных и телесных недугов скорый целителю.

Молитва

О всеблаженне Агапите, земный Ангеле и небесный человече! Припадаем к тебе с верою и любовью и молим ти ся прилежно: яви нам смиренным и грешным святое свое заступление; се бо грех ради наших не имамы свободы чад Божиих просити о потребах наших Господа и Владыку нашего, но тебе, молитвенника благоприятнаго, к Нему предлагаем и просим тя со усердием многим: испроси нам от благодати Его благопотребная дары душам и телесем нашим, веру праву, любовь ко всем нелицемерну, в злостраданиях терпение, тяжкими болезнями одержимым — от недугов исцеление, под бременем скорбей и напастей неудобноносимых падающих и жития своего отчаявшихся твоими молитвами получить скорое облегчение и избавление. Не забуди, блаженне отче, и обитель сию святую, присно тя чтущую, но соблюди ю и всех живущих и подвижающихся в ней и на поклонение в ню приходящих невредимыми от искушений диавольских и всякаго зла. Егда же приспеет наше от временнаго сего жития отшествие, и к вечности преселение, не лиши нас помощи твоея небесная, но молитвами твоими всех нас приведи в пристанище спасения и наследники яви нас быти всесветлаго Царствия Христова, да поем и славим неизреченныя щедроты Человеколюбца Бога Отца и Сына и Святаго Духа и твое вкупе с преподобными Антонием и Феодосием отеческое заступление во веки веков. Аминь.

